



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XLI No. 6
Marso 21, 2010
www.philippinerevolution.net

Editorial


Lubos nga ilatag ang mga rekisito para lab-uton ang estratehikong pagkapatas

Nagalanog sa kada pamusod sang pungsod ang kadalag-an sang taktikal nga opensiba sang mga Pu-lang hangaway sa Mansalay, Oriental Mindoro sang Marso 6. Kinse ka pasistang tropa ang napapas kag pito ang napilasan. Trese ka mabaskog nga armas ang nakumpiska sa kaaway kag nadugang sa arsenal sang hangaway sang banwa. Malipayon nga ginsaulog ang kadalag-an nga ini indi lang sang pumuluyo sang Mindoro, kundi sang bilog nga pumuluyo. Naghatag ini sang

inspirasyon kag duso sa bilog nga rebolusyonaryong hublag nga lubos isulong ang demokratikong rebolusyon sang banwa tuhtub sa kadalag-an. Signipikante ang kadalag-an nga ini kag iban pang taktikal nga opensiba labi na sa atubang sang nagahilapit nga ika-41 anibersaryo sang Bag-ong Hangaway sang Banwa.

Ginasugpunan kag ginapatampok sang mayor nga kadalag-an sang BHB sa Oriental Mindoro ang sunud-sunod nga mga kadalag-an sang BHB halin pagsugod sang tuig sa nagkalain-lain nga bahin sang pungsod. Nagahagunos ang madinalag-on nga mga taktikal nga opensiba sang BHB sa Abra, Kalinga, Mountain Province, Bulacan, Quezon, Palawan, Albay, Camarines Sur, Catanduanes, Sorsogon, Masbate, Eastern Samar, Negros, Agusan del Norte, Agusan del Sur, Surigao del Norte, Surigao del Sur, North Cotabato, Compostela Valley, Davao Oriental kag iban pang mga prubinsya sa bilog nga pungsod.

Talalupangdon nga ginalaragway sang wala-tuo nga mga kadalag-an nga ini ang kapaslawan sang kontra-rebolusyonaryo nga kampanyang Oplan Bantay Laya (OBL) sang rehimeng US-Arroyo kag Armed Forces of the Philippines. Sa pihak sang nangkon naton nga pilas sa atubang sang mabaskog kag sustenidong



Mga tampok sa isyu nga ini...

Elite forces sg militar, napapas sg BHB sa Mindoro
PAHINA 4

Morong 43, padayon nga ginaipit
PAHINA 5

Hacienda Luisita, di pagbuhian sg mga Cojuangco
PAHINA 12

atake sang kaaway, labi kita nga napanday kag nagabaskog. Naga-padayon kita sa pagkuha sang mga leksyon, nakapalig-on kag nakapabaskog. Mabaskog nga bunal ang ginahatag naton sa kaaway.

Ara sa pusisyon ang BHB nga maglunsar sang ginatos ka taktikal nga opensiba sa subong nga tuig, lakip ang pila ka pulo nga mayor nga bunal batuk sa mga pasistang pwersa sang kaaway. Labing mapadamo pa ang mga ini sa masunod nga mga tuig. Kadungan sini, kinahanglan ipatuman ang mga hilikuton para sa tanan-nga-bahin nga pagsulong sang inaway banwa kag paglatag sang malapad nga solidong basehan para lab-uton ang masunod nga halintang sang estratehikong pagkapatas sa katunganan sang subong nga dekada.

Dapat tumuron kag bakbakon ang mga bara kag pauswagon ang mga sangkap para sa sige-sige kag labing madasig nga mapabaskog ang armadong rebolusyonaryong hublag.

Yabi sa mga ini ang pagpabaskog sang liderato kag bilog nga organisasyon sang Partido kag hangaway sang banwa sa patag sang ideolohiya, pulitika, militar kag organisasyon. Lakip na diri ang mala-

paran nga rekrutment, pagsiguro sa konsolidasyon kag nagapadayon nga pagpauswag, maid-id nga edukasyon, paghanas kag maayo nga ebalwasyon, pagdeploy kag pagtatap sa mga kadre kag pwersa. Kinahanglan makapauswag sang lain-lain nga andana sang pagpamuno lunsay sa Partido kag hangaway sang banwa. Dapat pasanyugon ang mga sentro sang liderato, kag amo man ang mga ikaduha tubtub ikatlong linya sang pagpamuno.

Dapat mapauswag ang hugot nga pagpamuno sa gera sa pungsodnong lebel, rehiyon, subrehiyon, prubinsya kag prente. Lakip diri ang pagpagguwa sang nagakago nga mga ubay, maid-id nga pagplano kag koordinasyon sang mga kampanya, taktikal nga opensiba kag depensa; magpakaayo sa pagkumbina, pagdispers kag pagsaylu-saylo sang mga pwersa kag epektibong pagpusisyon kag maksimisasyon lunsay sang mga pwersang bertikal (o mga sentro-de-grabidad) kag mga pwersang horisontal. Dapat magpakaayo sa pagbantay sa kada hulag sang kaaway kag pagpataas sang ikasarang sa madasigan kag pleksibleng paglunsar sang mga taktikal nga opensiba.

Dapat pataason ang disiplina kag pinuhon ang hilikuton sa seguridad. Dapat hugot nga pamunuan ang mga kampanya pulitikal kag propaganda agud batuan ang mga kampanyang saywar sang kaaway.

Dapat abuton ang kusog-kumpanya nga lebel sa mga prenteng gerilya agud may dugang nga ikasarang kag pleksibilidad ang armado nga rebolusyonaryong pwersa sa pag-atubang, pagtiyog, pag-atake sa kaaway kag sa pag-agaw kag pagmentenar sang inisyatiba sa gera. Kinahanglan dugang nga padamuon ang mga kusog-kumpanya nga prenteng gerilya tubtub masakop ang halos tanan nga distrito kag maabot sang Pulang gahum ang bug-os nga kapuluan. Isa ka yabing sangkap nga ginapauswag naton subong ang pagpunpon sang magkatambi nga mabaskog nga prenteng gerilya pakadto sa pagtukod sang mas madamo nga mga subrehiyunal nga eryang militar, labi na sa mga estratehikong lugar.

Kasugpon sang mga ini ang pag-id-id kag labi nga pagpalarga sang inaway gerilya paagi sa pagdeploy sang platun sa kada sakop nga munisipalidad, pagpalapnag sang mga lokal nga yunit sang hangaway sang banwa sa mga baryo kag pagdebelop sang dugang pa nga madamo nga pwersang bertikal. Kinahanglan makatukod man sang mga yunit partisano ang mga prenteng gerilya kag pabaskugon ang operasyon sang mga ini sa mga kasyudaran nga sakop sang prente.

Ang kinahanglanon nga labing pagpadaku sang Pulang hangaway dugang pa nga mapapagsik paagi sa kahublagang masa sa hilikuton militar. Kinahanglan ang malaparan, madamuan nga pagtukod kag pagpabaskog sang mga yunit milisya, mga kwerpo kag yunit sa kagalingon nga pagdepensa tubtub lebel platun sa baryo. Kinahanglan pahulagon sila sa hilikuton paniktik, operasyon pangharas, isparo



Tuig XLI No. 6 Marso 21, 2010

Ang *Ang Bayan* ginabantala sa leng-gwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editoryal

Ilatag ang mga rekisito sg
estratehikong pagkapatas **1**

Madinalag-on nga opensiba 4

Pagpanghalit sg pasistang estado 5

Kampanyang masa sa El Niño **9**

100 tuig paghimakas sg kababaihan **10**

Kababaihan, martsa sa Mendiola **10**

Kontrobersya sa PGH **11**

Reklamo sa pagtaas sg matrikula **11**

Hacienda Luisita, indi pagbuhian **12**

Maniobra para magpabilin si Arroyo **13**

Balita 14

Ang *Ang Bayan* ginabantala duha ka beses kada bulan
sg Komite Sentral sg Partido Komunista sg Pilipinas

kag agaw-armsa batuk sa kaaway kag iban pang hilikuton militar sa lokalidad, sandig sa mandu kag ubay sang nagakaigo nga kumand sang hangaway sang banwa. Sa paghulag sang pila ka pulo kalibo nga mga lokal nga armadong pwersa, mapatingkad ang pangmasang kinaia sa sang inaway banwa kag masiguro ang madamuan nga rekrutment sa hangaway sang banwa.


Dapat may dugang nga panahon ang mga pwersang horisontal sang BHB para sa mga taktikal nga open-siba, iba pang hilikuton militar kag iban pa nga malahalang nga hilikuton sa sakop sang ila ginapamunuan nga prente. Sa sini, indi malimita ang hilikuton militar sa mga pwersang bertikal kag masiguro ang malapnagon nga gera. Sa sini, dapat pauswagon kag pahulagon ang mga lokal nga sanga sang Partido kag mga aktibisang masa para maayo nga maatubang ang mas daku nga bahin sang hilikuton masa. Lakip diri ang madamuan nga aspeto sang hilikuton konsolidasyon kag pang-organisasyon, pangpropaganda, kampanyang masa, mga hilikuton sosyo-ekonomiko, hilikuton alyansa, paglubad sang mga banggianay sa tunga sang pumuluyo kag madamo pang aspeto sang lokal nga gubyerno sa ila mga baryo, kag pati sa pagtukod sang mga bag-o nga nangungat kag pagpalapad sa mga katambi nga baryo.

Malahalang nga magpasaka sang mas madamo nga lokal nga kadre agud magtungod sang mga hilikuton sa seksyong lebel. Labing kinahanglan pa ang pangkabilugan pero maid-id nga pag-ubay sang mga nagapamuno nga komite kag kadre sang seksyon sa lokal nga sanga sang Partido kag mga lokal nga aktibista sa pag-asikaso sang mga hilikuton nga ini. Dapat dugang nga padamuon kag pabaskugon ang mga rebolusyonaryo nga organisasyong masa, mga organo sang gahum pangpulitika, mga lokal nga lider kag aktibista nga magaserbi

nga daku nga bulig sa pag-angot, pagpukaw, pag-organisa kag pagmobilisa sa malapad nga masa kag pangunahon nga bubon sang rekrutment sang Partido kag hangaway sang banwa. Dapat pauswagon kag pataason man ang lebel kag sakop sang pagtukod sang mga rebolusyonaryo nga organisasyong masa kag organo sang gahum pangpulitika tubtub sa bug-os kag kadam-an sang mga munisipalidad kag distrito. Kinahanglan man ang mas madamo nga pagdeploy sang mga kadre, pwersa kag aktibista halin sa kasyudaran kag mga sentrong banwa, lakip ang mga naghalin sa kubay sang mga mamumugon kag nakaeskwela nga pamatan-on.

Daku nga paktor sa pagpadasig sang pagpalapad kag pagpalig-on sang baseng masa ang mapagsik nga pagpasulong sang rebolusyong agraryo, mga kampanya kag paghimakas sang masa para sa interes kag mga kinahanglanon nila. Palaparon ang mga ini tubtub sa lebel-munisipalidad, distrito kag pasaka. Papagsikon sa tanan nga sakop ang mga kampanyang antipyudal, antipasista kag anti-imperyalista. Paagi sa mga ini, madasig nga malab-ot ang mga lugar nga dapat masakop sang pagorganisa kag paglatag sang rebolusyonaryong gahum pangpulitika.

Sa atubang sang paglala sang kaimulon bunga sang lokal kag internasyunal nga krisis, dapat sigesige nga mapasulong ang mga kampanya kag paghimakas para sa reporma sa duta, pagpanubo sang renta sa duta kag interes sa pantang; pagpasaka sang suhol sang mga mamumugon sa uma; pag-angkon sang matarung nga presyo sang mga produkto nila; pagpangapin kag pagduso sa mga kinamatarung kag interes nila; pagpauswag sang produksyon, mga proyektong sosyo-ekonomiko, iban pang aktibidad sa kaayuhan sang pumuluyo. Labing magpaaktibo ang mga ini sa pumuluyo sa pagsakdag kag labing



pagsulong sang rebolusyonaryong paghimakas.

Ang labing nagainit nga sitwasyon pangpulitika bunga sang nagalala nga kaimulon kag kapigusan sang pumuluyo kag kaakig nila sa mga nagahari padayon nga ginagatungan sang wala-tuo nga padihot sang nagaharing rehimen para makakapyot sa poder kag sang nagasingki nga banggianay sa tunga sang mga reaksyunaryo nga nagaginagaway sa gahum. Nagahana ang mabaskog nga paglupok sang krisis pangpulitika nga mahimo magkadto sa panibag-o nga malaparan nga pangpulitikang bagyo nga madamo nga beses nga makapadasig sa pagsulong sang rebolusyonaryong gera kag paghimakas sang pumuluyo. Malahalang nga hingalitan sang rebolusyonaryong kahublagan ang tuman kapaborable nga kahimtangan nga ginabunga sang mga ini.

Indi mag-untat ang reaksyunaryong estado sa paglunsar sang mga kontra-rebolusyonaryong kampanya sa pagtapna. Asta sa ulihi nga ginahawa sang garuk, papet nga reaksyunaryong estado kag sistema, tinguhaon gihapon sini ang tanan sa salimuang nga handum nga dugmukon ang armadong rebolusyonaryong hublag. Asta sa bisperas sang lubos nga kadalag-an, padayon kag paliwat-liwat nga magaagi sa mabaskog nga pagtilaw kag mas daku nga paghangkat ang rebolusyonaryong pwersa kag pumuluyong Pilipino.

Handaan kag padayon nga lubos nga batuan kag paslawon ang madamo pa nga parehong OBL samtang labi naton nga ginasulong ang inaway banwa kag ginalatag ang mga sangkap sa paglukso sini sa mas mataas nga lebel.

AB



Platun sang *elite* nga pwersang militar, napapas sang BHB sa Mindoro

Isa ka platun sang mga *elite forces* sang 2nd Infantry Division sang Philippine Army ang napapas sang Bag-ong Hangaway sang Banwa (BHB) sa isa ka ambus sadtong Marso 6 sa Barangay Panaytayan, Oriental Mindoro. Ini na ang pinakadaku nga kaswalti sang militar batuk sa armadong rebolusyonaryong pwersa subong nga tuig.

Nagapatigayon sang *clearing operations* ang isa ka platun sang 23rd Division Reconnaissance Company (DRC) sa pagpamuno ni 2Lt. Ronnie Sipsip sang lambatan sila sang mga Pulang hangaway sang BHB bandang alas-5:30 sang aga. Nadugmok ang bilog nga platun sang mapatay ang 15 suldado sini kag napilasan ang pito nga iban pa. Napulo'g isa ang patay kag pitong ang pilason lamang ang ginbalita sang militar sa midya.

Nakumpiska sang BHB ang 13

mabaskog nga armas halin sa kaaway. Nagalakip ini sang 7 ka M16, duha ka M14, duha ka M203 *grenade launcher*, isa ka M60 *light machine gun* kag isa ka Daewoo K3 *light machine gun*. Nakakuha man sang mahalalon nga gamit militar.

Ang madinalag-on nga ambus ang ikaduhang tion nga napapas ang isa ka platun sang kaaway sa Mindoro. Sang Abril 1991, gin-ambus kag napapas ang isa ka 21-katawong platun sang 215th PNP Coy sa idalom sadto ni Capt. Enrico Salapong.

Antes ang ambus nga ini, may pila ka mga taktikal nga opensiba kag inaway nga natabo sa Mindoro. Naengkwentro sang isa ka platun sang BHB ang 26-katawong platun sang 80th IBPA sa Sityo Tagumpay, Baryo Mapaya, San Jose, Occidental Mindoro sang Pebrero 24. Duha ka suldado ang napilasan samtang hilway nga nakaatras ang mga Pulang gerilya. Isa ka adlaw antes sini, ginsilutan sang BHB ang isa ka masupog nga kontra-rebolusyonaryo sa Sityo Imok, Barangay Pacollo, Magsaysay. Gin-isnayp man sang BHB ang mga nagaoperasyon nga tropa sang 4th IB sa Barangay Tumbaga, Mansalay sang Pebrero 17. AB

Suldado napatay, 3 napilasan sa ambus

Isa ka suldado sang 69th IB ang inapatay sang palukpan sang BHB ang ila salakyan samtang ginatuytoy sini ang tunga-tunga sang Baryo Paradise Embac kag Paquibato District Proper sa Davao City sang hapon sang Marso 12. Tatlo pa ka suldado ang nareport nga napilasan sang tuyuon nila nga kuhaon ang isa ka salakyan nga ginagamit sa kampanya ni Speaker Prospero Nograles nga ginkumpiska sang BHB. Si Nograles isa sa mga pangunahong alipulares ni Gloria Arroyo.

Antes ini, ginlambatan sang isa ka yunit sang BHB sa Negros Occidental ang isa ka platun sang 12th IB sang gab-i sang Marso 11. Isa ka CAFGU ang napatay samtang napilasan ang isa pa ka pwersang paramilitar. Natabo ang ambus sa Sityo Tagaytay, Baryo Camalandan, Cauayan. Nakakumpiska diri ang BHB sang isa ka M14. AB

25th IB, ginsilutan

Apat ka suldado ang napatay kag indi maisip ang napilasan sang ambuson sang Conrado Heredia Command sang Bag-ong Hangaway sang Banwa sa Southern Mindanao ang 70-katawo nga Alpha Coy sang 25th IB sa idalom ni 1Lieutenant Inocencio. Ang ambus nga naglawig sang isa ka oras ginlunsar sang Marso 6 samtang nagaoperasyon ang mga suldado sa Purok 7, Baryo Salvacion, Monkayo, Compostela Valley.

Ang gin-ambus nga yunit kabahin sang tropa nga nagaoperasyon sa lain-lain nga mga baryo sa Diwalwal nga bantog sa reserbang bulawan.

Pagsilut ang ambus sa 25th IB bangud sa paggamit sini sa mga pulitiko nga *warlord* nga tag-iya sang daku nga minahan sang bulawan sa lugar kag kasosyo sang mga dumuluong nga minahan. Labi nga nagsunson ang pag-operasyon sang 25th IB halin sang buksan sang gubyrnong Arroyo ang Higanteng Bato sa Diwalwal bilang bag-ong *gold reserves site*. Ginalatag sang militar ang dalan para sa mga dumuluong kag lokal nga kumprador nga nagapinalumba nga makabukas sang mga minahan diri.

Ang 25th IB nagserbi nga pribadong *goons* nanday Joselito Brillantes, bokal sang Compostela Valley kag Manuel Brillantes, meyor sang Monkayo, nga lunsay nagapadalagan subong nga eleksyon. Ang mga Brillantes ang nagapanag-iya sang JB Management and Mining Corp.

Kadungan sang pagduso sini sang kandidatura sang mga Brillantes, hayag nga nagakampanya ang 25th IB para sa manok ni Arroyo nga si Gilbert Teodoro.

Pagkatapos sang ambus, nagbalos ang 25th IB paagi sa pagpang-ipit sa mga sibilyan sa lugar. Sang Marso 7, gin-abangan sang mga elemento sang Bravo Coy sang 25th IB ang siyam ka mangunguma sa isa ka tsekpoynt sa Km. 56 sa Baryo Pasian, gintayaan sang baril kag ginkumpiska ang dala nila nga mga pagkaon. AB

Padayon nga ginaipit ang Morong 43


Padayon ang wala katapusan nga paglapak sa tawhanong kinamatarung sang Morong 43 kag pagpang-ipit sa ila sang Armed Forces of the Philippines kag sang mga reaksyunaryong korte. Ang Morong 43 nagatunod sa 43 nagatrabaho sa ikaayong lawas nga gindakup sang Pebrero 6 sa Morong, Rizal kag ginaakusahan nga mga katapo sang Bag-ong Hangaway sang Banwa. Sa pihak sang malaparan nga pagpakamalaut sa paglapas sa proseso kag tawhanong kinamatarung, padayon nga ginakulong sang AFP ang Morong 43 sa Camp Capinpin sa Tanay, Rizal.

Ginbasura sang Court of Appeals (CA) ang petisyon sang Morong 43 para sa *writ of habeas corpus* sang Marso 10. Suno sa CA, indi pwede may *writ* ang mga paryente sang 43 nagatrabaho sa ikaayong lawas bangud napasakaan na ang mga detenido sang kaso kriminal sa korte. Suno pa sini, bisan nga ginsiling may mga paglapas sa mga kinamatarung sang mga biktima, napanas na ang mga ini sang mga kaso kriminal nga ginpasaka batuk sa ila kag sa pagpagguwa sang *commitment order* sa militar para sa padayon nila nga pagkahunong.

Gingamit nga basehan sang CA sa indi paghatag sang *writ* ang isa ka doktrinang gingamit sa panahon sang layi militar kon sa diin ginasingahum nga ligal ang pagkulong sa isa ka detenido sa tion nga mapasakaan sang kaso bisan pa iligal ang

ginhimo nga pag-aresto sa iya.

Samtang, sari-sari nga pagpang-ipit ang ginahimo sang militar sa mga detenido nga nagatrabaho sa ikaayong lawas. Sang Marso 1, sekreto nga ginsaylo sang AFP ang tatlo sa ila sa indi pa matunod nga lokasyon. Ang tatlo amo sanday Ellen Carandang, Cherielyn Tawagon kag Valentin Paulino. Una sila nga ginkuha sa ila mga kulungan sang kaaganhon sang Marso 1, ginbalik sang aga kag liwat sang alas-2 sang hapon upod na ang ila mga gamit. Wala ginpahibalo sa ila mga paryente kag abugado ang pagsaylo sa tatlo. Sining ikaduha nga simana sang Marso, gin-upod sa tatlo ang duha pa nga detenido—sanday Jennylyn Pizarro kag John Mark Barrientos. Kadungan sang padayon nga sikolohikal kag mental nga tortyur,



ginaganyat man sila sang mga militar sang suhol kag espesyal nga mga pribilehiyo, para makigbuligay sa militar batuk sa iban pa.

Padayon man nga nabudlayan ang mga abugado, paryente kag mga nagakabalaka nga grupo nga masugilanon ang mga biktima. Paisa-isa nga detenido lamang ang ginatugutan kumonsulta sa iya abugado sa kada kahigayunan. Suno kay Atty. Romeo Capulong, abugado sang 43, ginatanyagan sang kwarta kag ginapahug sang militar ang mga biktima kag ila mga pamilya para magbalibad nga sila tinortyur kag mag-ugyon sa akusasyon sang militar nga sila mga katapu kuno sang BHB. Ginapilit man sila nga utdon ang serbisyo ni Capulong bilang abugado kag batunon ang iban nga abugado nga ginpili sang militar.

Marso 18, hayag nga nagbalibad ang militar nga ipaatubang ang Morong 43 sa nakatalana nga pagbista sang Commission on Human Rights. Ginadumilian man sang militar ang Karapatan kag GABRIELA, pati na ang mga abugado nga kunektado sa mga organisasyon nga ini, nga magbisita sa mga biktima.

Ituhaw si Ka Bea!

Mabaskog nga ginkundenar sang BHB-Southern Mindanao ang 26th IB sang Eastern Mindanao Command bangud sa paglapas sini sa mga kinamatarung ni Aiza "Ka Bea" Ligawas, 21, kag sa internasyunal nga layi sang gera. Si Ka Bea isa ka prubisyunal nga katapu sang BHB nga nagahulag sa idalom sang tim sa hilikuton masang Alejandro Lanaja Command-Front 3 Operations Command sang BHB.

Gin-aresto sang militar si Ka Bea sang Pebrero 27 sa Sityo Kilangkob, Barangay Kaigangan, Vereula, Agusan del Sur. Wala magdugay pagkatapos siya arestuhon, ginpasuksok siya sang uniporme nga militar kag ginhimo nga giya sa mga operasyon. Pagkatapos, gindala siya sa indi pa mapat-ud nga lugar. Tubtub sa subong wala pa ginapatuhaw sang militar si Ka Bea.

AB



Pagpang-ipit sa mga progresibo, nagasingki

Nagasingki ang harasment sa mga progresibong partido kag organisasyon samtang nagapalapit ang eleksyon sa Mayo 10. Pinakamabaskog ang harasment sa mga syudad kag sentrong banwa sang Metro Manila, Southern Tagalog kag Mindanao.

Sa Valenzuela City, nagkampo ang mga katapu sang 73rd Squad sang Philippine Air Force sa mismo biling nga nahamtangan sang upisina sang tsapter sang partidong Anakpawis sa syudad. Ginhambal ni Carlos Maningat, *public information officer* sang KMU, katapo sang Anakpawis nga ginatiktikan sang mga suldado ang mga aktibidad sang partido. Ginapunggan man nila ang pila ka myembro sini nga magtambong sa mga pulong sa ila upisina. May pila ka reklamo man nga ang mga suldado nagalibot sa bilog nga syudad para hambalan ang mga tawo nga indi pagbotohon ang nasambit nga partido, liw-as sa pagdumili nga magpasalibot ang AFP sa eleksyon.

Ginarason sang mga suldado nga ara sa komunidad sila para magbulig lang kuno sa paglimpyo sang mga kalsada kag magserbi nga mga bantay sa lugar kaangut sa pa-

laabuton nga eleksyon. Ang matuod nga naglapta na ang mga elemento sang militar sa mga imol nga komunidad sa Metro Manila halin pa sang Enero. Sa Balut kag Islang Puting Bato sa Tondo, nagalibot ang mga di-unipormadong elemento sang Civil Military Operations sang AFP. Nagapamalay-balay sila, ginakuhaan sang retrato kag ginapamangkot ang mga residente bahin sa ila pagkatawo kag kon sanday sin-o ang mga lider kag myembro sang GABRIELA sa lugar.

Sa pila ka barangay sa Taguig City, ginapadukot ang mga poster nga may mga laragway nanday Satur Ocampo sang Bayan Muna kag Liza Maza sang Gabriela Women's Party nga nagasiling "mga kandidato sang New People's Army sa partylist". Sa kaiping nga pader naman may ara nga mga poster sang berdugo nga heneral nga si Jovito Palparan, nga nagakandidato man

subong para sa Senado.

Sa Sorsogon, nagapamalay-balay man ang mga suldado umpisa subong nga Marso para lagson ang mga myembro sang Bayan Muna, Anakpawis, GABRIELA, Kabataan Partylist kag ACT Party. Sang Pebrero 23, ginkumpronta sang isa ka Maj. Arnel Manjares ang isa ka grupo sang mga boluntir nga nagakampanya para kanday Satur Ocampo kag Liza Maza kag ginsampal ang isa sa ila sa guya. Ginbayaw ni Manjares ang iya pistola kag ginpahog nga patyon ang mga boluntir.

Sa Calamba City, ginharas man sang mga katapo sang 202nd Bde ang mga myembro sang Bayan Muna sa Laguna sang Marso 7. Nag-abot sa Sityo Kabute, Baryo Real sa Calamba ang mga suldado sa pagpamuno ni Lieutenant Ansino para maglunsar kuno sang *feeding program* sa lugar. Pero pag-abot nila didto ginapangita nila ang mga katapo sang Bayan Muna. Nagbalibad ang mga residente nga pasudlon sa ila nga lugar ang mga suldado. Ginbarikadahan nila ang mga suludlan kag guluwaan sang komunidad gani napwersa nga maghalin ang mga suldado pagkaaga.

Sa Mindanao, ginpangkakas sang mga suldado nga nakasibilyan ang mga poster kag iban pa nga mater-yales pangkampanya nanday Ocampo kag Maza sa Cagayan de Oro kag Iligan. Sa Baganga, Davao Oriental, aktibo nga nagakampanya ang mga katapo sang 67th IB batuk sa mga progresibong partido kag kandidato. Katuwang man sang 10th ID sa SMR si General Palparan sa pagpalapta sang hilo batuk sa mga lokal nga progresibong kandidato. Si Palparan, nga nakabase subong sa Davao City nagapadayon sa iya kampanya sa pagpanamad sa mga progresibong lider kag aktibista.

Balay sang upisyal sang Bayan Muna, ginhabuyan sang granada

Ginhabuyan sang duha ka granada sang duha ka tawo nga sakay sang motorsiklo ang balay sang pangprubinsya nga lider sang Bayan Muna sa Aklan sining Marso 19 sang aga.

Wala sang napilasan pagkatapos maglupok ang isa ka granada sa likod sang balay ni Fernando Baldomero sa Barangay Sta. Cruz-Big-a, Lezo, Aklan. Wala maglupok ang isa ka granada nga nagsulod sa balay pero nagsab-it ini sa isa ka kabinet.

Si Baldomero, reeleksyunista nga konsehal sang banwa sang Lezo, nagakampanya para kanday Satur Ocampo kag Liza Maza sang Makabayan Coalition kag Nacionalista Party. Ginkundenar ni Ocampo ang pagpang-atake kag ginabasol niya ini sa padron sang pagpang-atake sa mga aktibista kag mga kritiko sang administrasyong Arroyo.

AB

AB



Abuso sang militar sa Samar

Lapnagon ang pagpang-abuso sang militar sa mga interyor nga banwa sang prubinsya sang Samar.

Sa San Jose de Buan, isa ka mangunguma ang gindukot sang mga suldado, gintortyur kag pilit ginpagiya sa operasyon militar. Si Bertino Maestre, 60, taga-Sityo Salvacion, Baryo San Nicolas, San Jose de Buan gindakop sang mga katapo sang 34th IB upod ang iya syete anyos nga anak kag pilit nga ginpaupod sa ila mga operasyon halin Marso 2-4. Suno kay Maestre, ginapilit siya sang mga suldado nga itudlo ang mga kampo sang BHB. Sang wala siya sang matudlo, gintakpan sang mga suldado sang plastik nga supot ang iya ulo kag ginbakol sa atubang mismo sang iya anak. Gintumod ni Maestre ang pila sa nagtortyur sa iya nga mga suldado nga nagahingalan "Angel" kag "Francisco" kag isa ka Lieutenant Latonio.

Antes sini, gindukot man sang mga katapo sang 34th IB ang anak

ka mangunguma ang gindukot sang isa ka kadre sang Partido Komunista sang Pilipinas kag BHB. Si Michelle Adelantar, 17, gindakop sang Pebrero 3 sang mga katapo sang 34th IB sa San Jose de Buan. Iligal ini nga ginkulong sang militar kag ginsaylo sa kustodiya sang Department of Social Welfare and Development bangud siya menor de edad. Ginpaguwa sang 8th ID nga ginsalbar kuno nila si Michelle halin sa pagka "bata nga suldado". Mabaskog nga ginpanginwala sang NDF-Eastern Visayas ang pagbutang-butang sang 8th ID. Siling sini, sa edad nga 17 anyos wala pa sa talaksan si Michelle para mangin gerilya sang BHB.

Samtang, ginbuyagyag man sang mga upisyal sang Baryo Nagpapacao kag Del Rosario sa kaiping sang banwa sang Matuguinao ang

pagpang-abuso sang gintingob nga 63rd IB, 34th IB kag 83rd Division Reconnaissance Coy. Siling nila, gulpe na lang nagasulod kag magbase sa baryo ang mga nagaoperasyon nga mga suldado nga wala man lang nagpahibalo sa nasambit nga mga sibilyan nga upisyal.

Subong man, nagdugang ang pag-antus sang mga mangunguma bangud naapektuhan ang ila pagtrabaho kag hilway nga paghulag bangud pilit nga ginapatuman sang mga suldado ang *curfew* sa lugar. Suno man sa mga upisyal sang baryo, ginahimo man nga panaming sang mga suldado ang mga sibilyan. Ginaupod sila sa mga operasyon kag ginapauna sang mga suldado sa paglakat para indi sila pagatakehon sang BHB.

Naakig man ang mga upisyal sang baryo sa wala sang aksyon ni Mayor Jocella Dy sang Matuguinao bisan nga pila na ka beses nga ginreklamo sang mga mangunguma sa munisipyo ang pang-abuso sang mga suldado. AB

Mga sibilyan, ginahimo nga panaming sang 10th ID

Hayag nga paglapas sa internasyunal nga makatawong layi kag mga protokol sa gera ang pagtukod sang Armed Forces of the Philippines sang mga detatsment kag kampo militar sa sulod sang mga sibilyan nga komunidad. Pila sa mga kampo nga ini 500 metro lang ang kalayuon sa mga lugar nga madamol ang sibilyan nga populasyon.

Sa Southern Mindanao sa partikular, nagalab-ot sa 306,637 sibilyan ang direktang apektado kag pirme yara sa peligro bangud sa kalapit sang mga kampo sang militar sa ila nga mga puluy-an.

Hungod nga nagtukod ang AFP sang mga kampo sa tunga sang mga sibilyang komunidad para magamit sini ang pumuluyo bilang panaming batuk sa mga atake sang Bag-ong Hangaway sang Banwa.

Bangud man sa kalapit sang mga elemento sang reaksyunaryong militar sa mga komunidad, madamo nga kaso sang paglapas sa tawhanong kinamatarung ang natabo, labi na ang pilit nga pagpatapo sa mga grupong paramilitar pareho sang CAFGU. Sa mga komunidad sang Lumad, nagagamit ang AFP sang mga paramilitar nga lider halin sa kubay sang mga pungsodnong minoriya bilang patunay kuno



nga baton sang pumuluyo diri ang militar. Nagarekrut man ang AFP sang mga sibilyan nga ahente para magpaniktik sa ila nga mga kasi-maryo, manggamo kag waskon ang paghiliusa sang pumuluyo sa lugar.



Sa Davao City, may ginamentinar nga siyam ka detatsment ang militar—tatlo sa Toril, duha sa Calinan kag apat sa Paquibato. Apektado diri ang 76,766 sibilyan. Guwa pa ang mga detatsment sa mga hedkwarters sang 10th ID sa Panacan kag Task Force Davao sa Sta. Ana Wharf.

Sa Davao del Norte, may isa ka detatsment ang militar sa Carmen kag tatlo sa Asuncion. Apektado diri ang 3,305 sibilyan.

Sa Compostela Valley, may ara 78 detatsment militar sa mga banwa sang Compostela, Mabini, Maco, Maragusan, Mawab, Monkayo, Montevista, Nabunturan, New Bataan, Pantukan kag Laak. Apektado diri ang 160,314 nga sibilyan.

Sa Davao Oriental, 28 ang mga detatsment militar nga makit-an sa mga banwa sang Baganga, Bannaybanay, Boston, Cateel, Lupon, San Isidro kag Manay. Apektado diri ang 59,424 nga sibilyan.

Sa Trento, Agusan del Sur kag Lingig, Surigao del Sur may duha ka detatsment ang militar. Apektado diri ang 6,828 sibilyan.

Partikular sa Boston, Cateel, Lingig, Trento kag Monkayo, may mga detatsment o instalasyon ang 72nd Cadre Battalion (CB), 23rd CB, 36th IB, 25th IB, 110th Police Mobile Group (PMG), 1401st PMG, Philippine National Police, grupong panatiko nga Pulahan kag mga pribadong hangaway sang mga Brilliantes, isa ka pamilya sang mga *warlord* nga pulitiko sa Compostela Valley.

Tanan-tanan may 123 detatsment militar sa mga sibilyan nga komunidad.

Sa kahadlok sang AFP nga margetang sang nagasingki nga mga taktikal nga opensiba sang BHB, naghimo ini sang mga tikang nga hungod nga peligroso sa kabuhi sang mga sibilyan. **AB**

Pilipino nga *interpreter*, ginpatay sang mga suldadong nga Amerikano?

Isa ka Pilipino ang nasapwan nga patay sa kampo militar sa Marawi City ang ginakabalak-an nga ginpintasan kag ginpatay sang mga suldadong Amerikano. Ang biktima nga si Gregan Cardeño, 33 tuig ang edad, pila ka adlaw pa lang nga nagatrabaho bilang *interpreter* para sa mga suldadong Amerikano.

Suno sa Philippine National Police, tungang gab-i sang Pebrero 2 nagpakamatay si Cardeño sa kampo sang 103rd Infantry Bde sang Philippine Army sa Marawi City, Lanao del Sur. Tabon sa kama kuno ang gingamit niya sa pagpakamatay.

Pero nagapati ang pamilya kag mga paryente ni Cardeño nga siya ginpatay. Ini base man sa mga pahayag sang biktima sa iya asawa nga ginapintasan kag ginahimuslan siya sang mga suldadong US.

Aga sang Pabrero 2 nakabaton sang mga *text* kag tawag ang asawa ni Cardeño nga si Myrna. Nagahibi si Cardeño nga nagsiling nga tawgan ang ahensya nga nagpasulod sa iya sa trabaho para bawion na ang kontrata kag makahalin na siya sa kampo sang militar. Wala siya kuno gindala sa tunay niya nga destino kundi ginpasulod sa baraks sang mga suldadong Amerikano nga siya lang ang Pilipino.

Nagpangayo sang bulig ang pamilya ni Cardeño sa Kawagib, isa ka grupo nga nagasakdag sang tawhanong kinamatarung sa Mindanao. Nagpanayasat ang Kawagib sa kampo kon sa diin napatay si Cardeño. Gin-updan ini sang Commission on Human Rights (CHR) kag mga progresibong organisasyon. Ginpangayo sang pamilya ni Cardeño nga ipakita ang kwarto kon sa diin siya nasapwan nga patay, pati ang mga ginlubid nga tabon sa kama nga gingamit kuno niya sa pagpakamatay. Apang indi gusto ipakita ni Capt. Michael Kay

kag mga upisyal sang 103rd Bde sang US Army ang mga ebidensya sa rason nga may ila kuno nga kaugalingon nga imbestigasyon.

Nasapwan nga may mga pilas si Cardeño sa ulo, sa lawas, hita, kamot kag braso. Nagduda man ang pamilya ni Cardeño sa pahayag sang mga upisyal sang Philippine Army. Pati ang *autopsy* sang National Bureau of Investigation ginadudahan man. Wala nakasaad diri ang pila ka detalye sa kahimtangan sang bangkay ni Cardeño pareho sang pagbanog sang iya nga itlog kag pagbuka sang iya iriputan. Naglawig man sang isa ka bulan antes mapadala sa NBI sa Manila ang pahayag sang natabo.

Natingala man ang pamilya ni Cardeño bangud hublas kag nakashorts lang ini sang ara sa punerya na. Liw-as ini sa nakita nila nga laragway sang bangkay nga ginkuha sa eksena sang krimen ni SPO3 Ali Guibon Rangiris sang PNP-Marawi City. Sa retrato nagsuksok si Cardeño sang berde nga *T-shirt*, maong nga pantalon kag nagawa sang gamay ang iya nga *brief*. Napanas man ang mga larawan, rekord sang mga mensahe kag tawag sa iya *cellphone*.

Ginduso sang pamilya ni Cardeño nga maghimo sang bag-ong *autopsy* ang CHR sa bangkay niya. Magapasaka man sila sang kaso nga *obstruction of justice* sa mga upisyal sang 103rd Bde kag mga suldadong US bangud ginsamad nila ang mga ebidensya. **AB**



Kampanyang masa sa El Niño

Sa mga rehiyon nga ginabunalan subong sang malawig nga tig-ilinit dala sang El Niño, ang Cagayan Valley amo ang pinakagrabe nga nago. Base sa pahayag sadtong una nga bahin sang Marso, nagalabot na sa P5.1 bilyon ang kabilugan nga balor sang nasamaran nga mga produkto nga palay, mais kag pangisdaan sa rehiyon. Nagkalasamad man pati ang mga ulutanon. Sa banwa sang San Mateo, Isabela, imported nga monggo na ang ginabaligya sa tindahan bangud wala sang naani nga monggo ang mga mangunguma.

Sa pihak sang kagrabe sang pagpanghalit sang El Niño, wala pa sang ginahatag nga bulig sa mga mangunguma ang guberno. Tubtob sa plano pa lang sang pagpanghatag sang bugas kag delata ang tikang diri. Partikular sa Isabela, lebel sarbey pa lang ang nahimo sang mga gubjernong munisipal para tan-awon kon ano kuno kalapad ang epekto sang tig-ilinit. Nagpahulam sa mga mangunguma ang guberno prubinsyal sang 50 bomba sang tubig. Sa kunsiderasyon nga ang prubinsya isa sa mga pinakadaku nga prubinsya sa pungsod, tuman ka kulang ang mga bomba sang tubig nga ini nga ginpanagtag sa mga pili nga tawo lang. Isa pa, bisan may bomba sang tubig ang isa ka mangunguma wala naman sang makuha nga tu-

big sa mga sapa kag suba.

Bangud nagakapatay na ang tanan nga pananom, madamo sang pamilya ang nagaagi sang gutom. May pahayag nga ginatos ka mangunguma ang nagasulod sa katalunan para magpanguha sang uway nga ginabaligya nila sang P5 kada napulo ka pye. Sa isa ka bahin sang Central Isabela, 300 mangunguma ang isa ka simana nga nagapangahoy sa katalunan. Ang iban naman napilitan mag-*carabao logging*.

Sang Marso 4, nagkadto ang mga mangunguma halin sa Cagayan Valley sa Metro Manila kag naglunsar sila sang mga aksyon protesta sa upisina sang Department of Agriculture sa Quezon City. Ginpanunuan ini sang Danggayang dagiti Mannalon ti Isabela, Kagimungan-Cagayan Chapter kag Danggayang-

Cagayan Valley. Ini tanan nga mga organisasyon katapo sang Kilusang Magbubukid ng Pilipinas.

Sa pihak nga bahin, ginakasa subong sa rehiyon ang kampanya nga isulong ang kaayuhan sang pumuluyo sa panahon sang mga kalamidad. Una nga pagasukton sang pumuluyo ang guberno sa papel sini sadtong nagaatake ang bagyong Ondoy kag Pepeng kag ang pagpabaya sang guberno sa agrikultura sa kahimtangan nga ang Cagayan Valley ang isa sa ginhalinan sang daku nga bulto sang bugas sa pungsod. Iban pa nga kangut nga mga isyu ang pagpangurakot sa pondo samtang ginahatagan-dalan ang mga proyekto nga nagasamad sa naturalisa. Matingkad diri ang daku nga pagpangtroso kag pagmina nga kahimbon sanday Sen. Juan Ponce Enrile kag daku nga kumpanyang imperyalista.

Igaduso man sang mga organisasyong masa ang masunod:

►Indi pagbayad sang arkila sa isa ka tig-alani sang mga mangunguma nga 20% pataas ang nahalitan nga pananom sa kalamidad. Kon 50% pataas ang halit, indi pagbayaran ang arkila sa duha ka anihan.

►Sa ginarentahan nga duta nga natabunan bangud sa kalamidad, kwentahon ang gasto sa pag-ayos sang duta kag ibuhin ini sa kabilugan nga bayad o arkila sa duta sa kinaandan nga tig-alani.

►Pagdula sa interes sang pantang kon nahalitan sang kalamidad kag pagpaiway sang bayad sa prinsipal sang utang kon 50% pataas ang nasamad sa pananom.

Indi pagbayad sa irigasyon sang National Irrigation Administration kag Small Water Impounding Projects, isa ka sanga sang Department of Agriculture nga nagatukod kag nagapadalagan sang gagmay nga dam para sa mga ulumhan.

AB

100 tuig nga paghimakas sang kababaihan

Militante nga ginsaulog sang mga progresibo kag rebolusyonaryong kababaihan ang nagligad nga Pangkalibutanon nga Adlaw sang Kababaihan nga Anakbalhas sang Marso 8.

Espesyal ang nasambit nga pag-saulog bangud okasyon man ini sang ika-100 anibersaryo sang pagpasaka sang resolusyon sa Ikaduhang Kumperensya Pangkalibutanon sang Sosyalistang Kababaihan nga nagdeklarar nga espesyal nga adlaw sang kababaihan ang Marso 8. Ini sa inisyatiba sang nagapanguna nga komunistang babae sadto nga si Clara Zeitkin. Sang saulugon ang nasambit nga kumperensya sa Copenhagen, tatlo ka pungsod pa lang sa bilog nga kalibutan ang nagakilala sa kinamatarung sang kababaihan nga magboto kag tuman kalapnagon pa sang pagtrato sa mga kababaihan bilang segunda klaseng pumuluyo sa layi kag tanan nga patag.

Isa ka siglo makaligad sadto, madamo na ang naangkon nga mga mapuslanon nga kadalag-an ang progresibo kag rebolusyonaryong kababaihan sa bilog nga kalibutan. Naduso na sang kababaihan ang ila kinamatarung para magboto kag mabotohan sa halos tanan sang pungsod sa bilog nga kalibutan. Umpisa sadto, naagum na sang kababaihan ang ila basehan nga kinamatarung para organisahon ang ila nga mga kaugalingon kag iduso ang mga halambalanon nga importante sa ila sa bilog nga katilingban. Ara sila sa pusisyon nga isulong ang ila nga mga kinamatarung para sa edukasyon, trabaho, kag pagkaalalangay sa nagkalainlain nga patag. Sa sulod sang isa ka siglo, pursigido kag wala sang untat ang kababaihan para baguhon indi lang ang ila manubo nga tindog kundi ang katilingban nga nagbun-ag kag nagpabilin sa sini nga kahimtangan.

Nahibal-an sang mga progresibong kababaihan nga indi maagum ang tunay nga kahilwayan kag pag-

kapareho sa idalom sang bulok nga sistema pangkatilingban nga ginapasudlan nila subong.


Sa imol kag atrasadong pungsod, pinakanatam-an ang kababaihan sa pirme nga krisis sa palangabuhian nga nagabunal sa mga lokal nga ekonomya. Ginatungdan nila ang pinakamanubo nga sahi sang trabaho, kabaylo sang halos wala o tuman kanubo nga sweldo. Ginabaylo sila sa kalalakihan sa panahon nga kinahanglan panubuan ang mga pangkabilugan nga lebel sang sweldo. Sa mga palangumhan, ginatumod nga libre ang ila kusog-pangabudlay. Dugang diri, madamo sa ila ang ginapaserbi bilang mga suluguon o uli-

pon sa mga agalon nga mayduta.

Sa mga kapitalistang pungsod, kadam-an sang mga mamumugon nga kababaihan nagabaton sang sweldo nga mas manubo sa kalalakihan. Nagaagi sila sang diskriminasyon sa lainlain nga pamaagi sa sulod sang mga upisina kag pabrika.

Para ipabilin nga kimi ang kababaihan, ginagamit batuk sa ila ang kalakasan sa nagkalainlain nga lebel kag patag. Tubtob sa subong, lapnagon ang pagpati kag kultura nga dapat magpaidalom ang kababaihan sa awtoridad sang nagaharing sahi, sang ila nga mga pamilya

kag ila nga mga asawa. Ginagamit ang pinakabrutal nga mga pamaagi pareho sang pagpanglugos kag sekswal nga kalakasan para siguruhon ang ila pagpanglupig. Indi katingalahan nga ang kalaka-



Kababaihan, nagmartsa sa Mendiola

Masobra 5,000 kababaihan kag pumuluyo, sa pagpanguna sang **GABRIELA** kag Gabriela Women's Party ang naglunsar sang aksyon protesta sa atubang sang Malacañang sang Marso 8. Halin sa nagkalainlain nga sektor ang mga nagmartsa. May mga pamatan-on, mamumugon, migrante, imol sa syudad kag mga mangunguma. Nagupod sa ila ang mga progresibong kandidato, iban pa nga mga pulitiko kag personalidad.

Dala ang panawagan nga "Kababaihan Maghiliusa, batuan ang krisis kag pangpulitika nga kalakasan," gindeklarar nila nga Pungsodnon nga Adlaw sang Protesta para sa Kababaihan nga Pilipino ang Marso 8.

May ara man nga katulad nga mga protesta sa mga syudad sang Davao, Cebu, Baguio, Iloilo kag Bacolod kag nagkalainlain pa nga mga lugar sa Southern Tagalog kag Bicol. Sa gwa sang pungsod, naglunsar sang kadungan nga mga aktibidad ang kababaihan nga migrante sa Hongkong, Amsterdam sa The Netherlands kag US. **AB**

san nga ini nga nagalapak sa bahang mga kinamatarung indi lang bilang babae kundi bilang tawo nga ginagamit sang nagaharing sahi kag ila mga armado nga gaway labi na batuk sa kababaihan nga ara sa manubo nga sari kag ang may kaisog nga magbato.

Sa Pilipinas, ginapasingki sang subong nga krisis sa ekonomya kag pulitika ang kaimulon kag pagpamigos nga gin-agan sang kababaihan nga Pilipino. Madugay na sila nga biktima sang maka-imperyalista nga mga pagsulundan sang liberalisasyon, pribatisasyon kag denasyunalisasyon sang rehimeng Arroyo. Amo man, biktima sila sang pangpulitika nga kalakasan sa idalom sang kontrapumuluyo nga Oplan Bantay Laya.

Katunga sang mga wala sang trabaho mga kababaihan. Madamo sa ila ang natiplang sang mga ilegal nga rekruter nga nagapangako sang disenteng mga trabaho sa gwa sang pungsod. Kadam-an sang 12 milyon nga migranteng mamumugon nga Pilipino mga babae. Dugang pa sa manubo nga sweldo kag pinakamalain nga kondisyon sa pagtrabaho, madamo sa ila ang nakaagi sang pisikal kag sekswal nga pagpang-abuso sa kamot sang ila amo. Sa kaumhan, nagalab-ot sa 70% sang mga mangunguma sa uma mga kababaihan. Ginabatas nila ang mga halit dulot sang mga polisiya sang liberalisasyon, wala sang untat nga importasyon sang mga produkto nga agrikultural kag pangkabilugan nga pagpabaya sang reaksyunaryo nga estado sa agrikultura.

Ginaduso sang kababaihang Pilipino ang disenteng pangabuhipagi sa bastanteng trabaho, pagkaon, maayo nga pabalay kag mga serbisyo sosyal pareho sa edukasyon kag ikaayong lawas. Ang pagbato para sa mga ini naangot sa paghimakas para tapuson ang atrasado kag mapiguson nga sistema. **AB**

Para sa pribatisasyon

Pagpili sa bag-ong direktor sang PGH, ginapasilabtan sang Malacañang

Indi matago ang papel sang Malacañang sa kontrobersyal nga pagtalana sa bag-ong direktor sang University of the Philippines-Philippine General Hospital (UP-PGH). Sa ulihing pulong sang Board of Regents (BOR), kapulungan nga nagadumala sa unibersidad, baraghal nga nagmanibra ang mga katapo nga ginpili ni Arroyo para pungan ang pagtalana kay Dr. Jose Gonzales nga amo ang suportado sang mga tiglawas sang mga estudyante, manunudlo, empleyado kag *alumni* sa kapulungan. Gusto tani sang Malacañang nga liwat italan si Dr. Carmelo Alfiler nga ara sa ika-3 termino bilang direktor sang ospital kag personal nga abyan ni Arroyo.

Ang matuod nga pormal nga ginpili si Gonzales para mangin direktor sang ospital sa pulong sang BOR sang Disyembre 18, 2009. Antes hiwaton ang botohan ginduso ni Abraham Sarmiento, isa sa mga katapo nga pinili ni Arroyo, nga indi pagpabotohon si Charisse Bañez, tiglawas sang mga estudyante, bangud wala man kuno siya nakaenrol kag gani indi na mag-eskwela sa unibersidad. Bisan pa man, sang mabotohan ang halambalanon nangibabaw ang para sa partisipasyon ni Bañez kag nangin desaysibo ini

para mapilian si Gonzales.

Pero sang Disyembre 23, nagsumiter sang protesta si Sarmiento bahin sa resulta sang piniliyag kag liwat niya nga ginduso nga wala sang kinamatarung si Bañez nga magpartisipar sa botohan. Katapusan naman sang Disyembre sang manduan sang Malacañang si Emmanuel Angeles, tagapangulo sang Commission on Higher Education kag sang BOR, nga si Alfiler ang suportahan.

Bangud sini, ginpaiway ang pagpili kay Gonzales tubtob indi ku-

Reklamo sa pagtaas matrikula

Ginapukpok sang Kabataan Partylist kag NUSP ang Commission on Higher Education (CHED) bangud sa wala sang askyon sini sa mga reklamo sang pagtaas sang matrikula sa kolehiyo. Suno sa NUSP, wala sang nahimo ang CHED para mahawiran ang mga tagiya sang eskwelahan nga magpataas sang matrikula.

Samtang, nag-walkout ang 1,000 tumuluon sang Polytechnic University of the Philippines (PUP) sang Marso 19 para pamatukan ang nagahana nga pagtaas sang ila matrikula. Nagmartsa sila halin PUP Sta. Mesa tubtob Mendiola sa Maynila. Nagalab-ot sa 2,000% ang igasaka sang matrikula (P200 kada unit ang proposal nga pagtaas halin sa daan P12 kada yunit) nga pagasukton sa masunod nga abre klase sa mga estudyante nga yara sa *first year* subong. May ara man nga iban pa nga mga balayran nga plano nga sukton. Natalana man ang ila daku nga paghulag sa palaabuton nga Marso 29 sa pagmiting sang Board of Regents (BOR) sang ila unibersidad. **AB**

no naresolba ang reklamo ni Sarmiento. Sa liwat nga pagpulung sang BOR sang Pebrero 5, namaniobra sang mga alipures sang Malacañang ang pagbalewala sa pagpili kay Gonzales. Sa panibag-ong botohay, napilian nga direktor sang PGH si Dr. Rolando Enrique Domingo nga amo ang ginsuportahan sang Palasyo. Si Domingo una na nga gindeklarar nga indi kwalipikado sa pusisyon sang Disyembre.

Pribatisasyon ang ugat. Nagagwa nga ara sa likod sang pagmaniobra sang Malacañang para makuha ang liderato sang PGH ang isa ka minilyon piso nga kontrata sang pagparenta sang pila ka pasilidad sang ospital sa pribadong sektor. Suno sa pinal nga kontrata, parentahan sang UP-PGH sa Daniel Mercado Medical Center (DMMC) ang Dispensary Building sini sa sulod sang 25 tuig sa balor nga P202 kada metro kwadrado. Ang tatlo ka panalga nga bldg may kabilugan nga lapad nga kulangkulang sa 5,000 metro kwadrado.

Ginpamatukan sang All-UP Workers' Alliance (AUPWA) ang kontrata sang pagpaarkila bangud dehado siling nila diri ang PGH. Suno kay Jossel Ebesate, *national executive vice president* sang AUPWA, P456 kada metro kwadrado ang arkila sang Philippine National Bank sa pareho nga lokasyon halin pa sang dekada 1990. Ginakahangawa man sang alyansa nga kumpitensyahan sang DMMC ang botika sang PGH nga nagaamot sang P24-P30 milyon tuig-tuig sa pondo nga bulig-sa-ka-luoy sang ospital kag nagasweldo sa masobra 200 empleyado. Lugi katama ang PGH sa P12 milyon tuigan nga arkila sang DMMC sa una nga lima ka tuig sang kontrata. Indi pa upod sa kwenta nga ini ang iban pang operasyon pareho sang sa laboratoryo, *radiology* kag *diagnostic exam* nga pagakumpetensyahan man sang DMMC. AB

Hacienda Luisita, indi pagbuhian sang pamilya Cojuangco

Ginpakamalaut ni Rep. Rafael Mariano sang partido nga Anakpawis si Benigno "Noynoy" Aquino III, kandidato sang Liberal Party sa pagkapresidente nga nagapostura lamang para sa tunay nga reporma sa duta apang wala sang tunay nga interes nga ipatuman ini.

Ang reaksiyon ni Mariano kangut sa pahayag sini lang ni Aquino sa isa ka interbyu sa telebisyon nga ang una niya nga himuon kon magdaog sa pagkapangulo sang pungsod amo ang pagpanagtag sa mga mangunguma sang kadutaan sang Hacienda Luisita Incorporated (HLI).

Siling sang progresibong representante, nga tagapangulo man sang Kilusang Magbubukid ng Pilipinas, ang pangako ni Aquino sang repormang agraryo para lang isulong ang iya kandidatura sa palaabuton nga eleksyon.

Ang matuod, ang pahayag ni Aquino ginkontra sang iya pakaisa nga si Fernando Cojuangco, suno sa isa ka artikulo nga naggwa sa *New York Times* sini lang.

Suno kay Cojuangco, *chief operating officer* sang Azucarera de Tarlac kag sang Jose Cojuangco and Sons, indi pabor ang pamilya Cojuangco nga ipanagtag sa mga agsador ang masobra 4,500 ektarya nga kadutaan sang Hacienda Luisita. Siling niya, ang nagakabagay sa indus-

triya sang asukal ang sistemang asyenda. Ang amo nga matiganga pahayag nga indi bisan sanoman pagbuhian sang mga Cojuangco ang ila malapad nga asyenda maathag nga nagapakita sang wala unod nga mga pahayag ni Aquino bahin sa halambalanon sang Hacienda Luisita.

Ginkastigo man ni Mariano si Aquino sa pagpabugal niya nga nagkita na tani sang P3 bilyon ang pamilya nga Cojuangco-Aquino sa pagbaligya sang 4,500 ektarya nga asyenda, kon wala gid man ini sang balatyagon sa interes sang mga mangunguma. Suno kay Aquino,

bayaran anay sang pamilya nila ang mga utang sang asyenda antes ipanagtag ang duta sa mga agsador. Gusto pagwaon ni Aquino nga may mahumok nga tagipusuon ang pamilya nila kag dapat pa nga magpasalamat ang mga mangunguma sa ila nga kaayo, siling ni Mariano.

Bisan pa man, indi mabutigan sang pamilya nga Cojuangco-Aquino ang kamatuoran, siling ni Mariano. Gingamit sang pamilya ang kaayo kuno nga ini para masakeron ang mga mangunguma kag himuslan kag dingutan sila sang ila kinamatarung sa duta, siling sang progresibong representante. AB



Mga tikang para sa pagpabilin ni Arroyo, ginakumpleto na

Paspasan nga ginakumpleto sang hubon Arroyo ang mga yabi nga sangkap sa nagkalain-lain nga padihot sini indi lang para makapabilin sa poder si Gloria Arroyo lampas ang iya subong nga termino, kundi para malikawan niya ang iya mga salabton sa banwa.

Pinakaulihi sa mga tikang sang hubon ang desisyon sang Korte Suprema sining Marso 17 nga nagatugot kay Arroyo nga magnombrar sang bag-o nga punong mahistrado kabaylo sang magaretiro nga hepe sang pinakamataas nga korte. Ginapangayo na ang listahan sang mga nominado sang Judicial and Bar Council para makapili na si Arroyo sang iganombrar niya kabaylo ni Chief Justice Reynato Puno. Ginapasumite na ni Arroyo isa ka simana bag-o ang ginatalana nga pagretiro ni Puno sa Mayo 17. Ang JBC ang kapulungan nga may upisyal nga katungdanan nga magsala sa tanan nga aplikasyon kag rekomendasyon para sa mga pwesto sa Korte Suprema.

Liw-as ang amo nga desisyon sa nauna nga desisyon sang Korte Suprema sang 1998. Paglapas ini sa probisyon sang konstitusyon sang gubyerno nga nagadumili sa nagapungko nga presidente nga magnombrar sang mga bag-o nga punong upisyal 60 adlaw bag-o ang eleksiyong presidensyal asta sa pagtapos sang termino sang pangulo. Kon sundon ang reaksyunaryong konstitusyon, ang bag-ong pili nga presidente amo ang dapat magpili sang kabaylo sang punong mahistrado. Pero bangud sa Hunyo 30 pa magapungko ang bag-ong presidente, awtomatikong magabulos anay ang pinaka-senior nga mahistrado.

Ang problema ni Arroyo indi niya kontrolado si Justice Antonio Carpio, ang pinaka-senior sa Korte Suprema. Gindeklarar man ni Carpio nga pananglit pilion siya ni Arroyo indi niya ini pagbatunon bangud

nagapanindugan siya nga lapas ini sa konstitusyon. Plano subong nga ibulos ni Arroyo kay Chief Justice Puno si Renato Corona, anay *chief of staff* kag tagapamaba ni Arroyo. Si Corona ang pinakatampad nga alipures ni Arroyo sa Korte Suprema. Sa bilog nga panahon niya diri, tanan nga pusisyon nga gindampigan niya pabor sa interes ni Arroyo.

Nagalagas subong ang madamo nga sektor sang rekonsiderasyon sang Korte Suprema kaangut sa desisyon nga ini. Upod diri ang mga abugado, organisasyong nagapan-gapin sa konstitusyon kag pwersang progresibo kag anti-Arroyo.

Ginaulan man sang protesta ang desisyon sang Korte Suprema. Sining Marso 19, nagralli ang lain-lain nga grupo sa atubang sang korte para kundenahon ang siling nila pagkahalog sang mga mahistrado nga nagpaguwa sang amo nga desisyon. Upod sa mga nanguna sa protesta si Bayan Muna Rep. Teddy Casiño, Sen. Francis Pangilinan, myembro sang Judicial and Bar Council; Solita Monsod, anay hepe sang NEDA; kag Adel Tamano, abugado kag kandidato sa pagka-senador.

Ginsunog man sang mga myembro sang Kabataan Partylist ang isa ka *tarpaulin* nga may retrato sang siyam ka mahistrado sang Korte Suprema nga nagpaguwa sang desisyon.

Nauna diri, ginpat-ud na ni Arroyo ang hugot niya nga uyat sa pamunuan sang Armed Forces of the Philippines kag mga yabing kumand sini.

Sining Marso 8, sa baylo nga palawigon na lang ang termino ni Gen. Victor Ibrado agud ang bag-ong presidente ang magapili sa magbaylo, gin-asignar na ni Arroyo bilang bag-ong hepe sang AFP ang paborito niyang heneral nga si Lt. Gen. Delfin Bangit. Sang Marso 12, gin-asignar man ni Arroyo si Maj. Gen. Reynaldo Mapagu bilang hepe sang Philippine Army, kabaylo ni Bangit. Gin-asignar man niya si Rear Admiral Feleciano Angue bilang hepe sang AFP National Capital Region (NCRCO).

Ang tanan nga bag-ong ginpili ni Arroyo nga mga upisyal militar nga myembro sang PMA Class 1978, nga hugot nga gintatap ni Arroyo bilang *adopted member* sini, kag sa sini nangin tampad sa iya. Ang iban pang myembro sang Class 1978, nga naasignar na ni Arroyo sa lain-lain nga nagapamuno nga pusisyon sa AFP amo sanday Lt. Gen. Oscar Ravena, hepe sang Philippine Air Force; Lt. Gen.



Roland Detabali, hepe sang Southern Luzon Command; Lt. Gen. Ralph Villanueva, hepe sang AFP Central Command; Brig. Gen. Romeo Prestoza, hepe sang ISAFP (Intelligence Service of the Armed Forces of the Philippines); kag Director Roberto Rosales sang Metro Manila Police Office nga ginasingling nga siya ang ibulos kay PNP Chief Jesus Versoza.

Samtang, huring-huring subong ang pag-arangkada sang Oplan August Moon nga ginasingling padihot para dayaan ang eleksyon agud mapadaog ang mga ginapaboran nga kandidato ni Arroyo, makasa ang pagbag-o sa konstitusyon kag makapungko bilang *prime minister* si Arroyo sa idalom sang bag-ong sistemang parlamentaryo.

Kon indi ini mag-obra, ginasingling nga magakambyo ang kampong Arroyo sa pagpadihot sang kapaslawan sang eleksyon para mangin rason sa deklarasyon sang *state of emergency* kundi man direktang layi militar, kag padayon nga pag-uyat ni Arroyo sang poder bilang "pangulo nga pangtransisyon." Gin-ako man sang bag-ong Deputy Spokesperson ni Arroyo nga si Charito Planas nga kon mapaslawan ang eleksyon kag indi maathag kon sino ang maga-uyat sang gahum uyatan ini sang militar.

Nauna na nga ginsiling ni Senate President Juan Ponce Enrile, nga nangin administrador sang layi militar sang panahon sang diktaturang Marcos. Yabi sa amo nga mga plano ang pag-asignar kay Norberto Gonzales para uyatan ang Department of National Defense, kag kanday Bangit, Mapagu, Prestoza kag iban pa sa AFP, para padayon nga mauyatan ni Arroyo ang gahum militar. Yabi naman ang pag-asignar kay Corona bilang Punong Mahistrado sang Korte Suprema para sa pag-asikaso sang ligal nga bendisyon sa anuman nga maniobra ni Arroyo. **AB**

6 grupo sa *party list* ni Arroyo, ginapakuha

NAGPIKET sa atubang sang talapatan sang Commission on Elections sining Marso 15 ang Kontra-Daya kag mga katapu nga mga organisasyon kag ginapanawagan ang pagkuha sa 6 grupo sa *party list* nga siling nila ginapondohan sang gubyernong Arroyo.

Gintumod sang Kontra-Daya nga ang masunod mga maki-administrasyong grupo sa *party list*: Bata Iwas Droga (BIDA), Adhikain ng mga Dakilang Anak ng Maharlika (ADAM), Agbiag Timpuyog Ilocano (AGBIAG), Babae para sa Kaunlaran (BABAE KA), League of Youth for Peace and Development (LYPAD) kag Kalahi Advocates for Overseas Filipinos (KALAHFI). Siling nila, ang mga ini may kuneksyon kag ginahatagan sang pondo sang gubyernong Arroyo. Sa partikular, ang BIDA nga ginapondohan ni Chairman Ephraim Genuino sang Philippine Amusement and Gaming Corporation kag nakaangot sa Dept. of Education kag

Dangerous Drugs Board. Ang ADAM naman sa idalom ni Department of Energy Undersecretary Zamzamin Ampatuan nga amo ang unang nominado sang grupo.

Suno sa isa ka nabulgar nga memo, direktang ginapondohan sang Palasyo ang Agbiag, Babae Ka, Kalahi kag Lypad.

Ginsiling ni Fr. Jose Dizon sang Kontra-Daya nga ang mga grupong *party list* nga ini gintukod nanday Arroyo para sa iya ambisyon nga makapungko bilang tiglawas sang ika-2 nga distrito sang Pampanga kag Speaker sang Manubo nga Panalagan sa ulihi. Dugang pa, ginlapas sang amo nga grupo ang layi angot sa pagdumili sa pagsulod sang mga grupong konektado kag ginapondohan sang gubyerno. Ginsiling man ni Dizon nga may ara pa nga 40 mga grupo sa *party list* nga ginasingling nga ginapondohan sang gubyerno o mga militar kag daku nga pulitiko nga kuhaon sang COMELEC.

Sukot sa *graduation*, ginapamatukan

MABASKOG nga ginaduso ni Kabataan Partylist Rep. Raymond Palatino ang pagdumili sa pagsukot sang *graduation fee* sa mga estudyante nga magatapos subong nga tuig. Suno kay Palatino, dapat imonitor sang Department of Education (DepEd) ang mga eskwelahan nga nagapanukot sang bayad sa *graduation*. Madamo nga reklamo ang nabaton sang ila partido bahin sa mga nakalusot gihapon nga mga eskwelahan sa pilit nga pagpanukot.

Suno sa Kabataan Partylist, nagalab-ot sa 40 pangpublikong buluthuan ang pilit nagapanukot sang *graduation fee* nga nagabalor sang P100-5,000 kada estudyante. Ginsiling ni Palatino nga ang solu-

syon sa amo nga halambalanon ang pagtigana sang bastante nga badyet sang gubyerno sa tanan nga kagastuhan sang mga estudyante, kaangut sini, ginhangkat ni Palatino ang bag-ong pungko nga Secretary of Education nga si Mona Valisno nga hatagan igtalupangod ang isyu nga ini. Ginsulong naman sang National Union of Students in the Philippines (NUSP) ang talatapan sang DepED sang Marso 19 para iprotesta ang padayon nga pagpanukot sang *graduation fee* sa mga boluthuan. Ginapahog man ang mga ginikanaan nga kon indi makabayad ang ila mga anak indi sila makamartsa sa entablado.

Deklarasyon sang *state of calamity* sa Mindanao, ginkwestyon

GINKWESTYON sang mga syen-tista ang pagdeklara ni Gloria Arroyo sang Marso 11 sang *state of calamity* sa Mindanao. Suno sa Agham (Samahang Nagtataguyod ng Agham at Teknolohiya para sa Sambayanan), ang tikang nga ini sala nga sabat sa krisis sa enerhiya kag pag-uyang lamang sang pondo.

Ang tikang nga ini nga kuno sabat sa nagaluntad nga krisis sa enerhiya sa isla nga nagapahanugot sa mga upsiyal sang banwa, prubinsya kag syudad nga gamiton ang 5% sang ila nga Internal Revenue Allotment (IRA). Magatigana man ang pungsodnon nga gubyrno sang P10 bilyon para sa mada-

sig nga pagbakal o pag-arkila sang mga *generator* nga indi paagi sa proseso sang publikong subasta.

Suno kay Engineer Archie Orillosa sang Agham, indi solusyon ang pagbakal sang mga *generator* nga indi lang masyadong magastos kundi abuton pa sang pila pa ka bulan bag-o mag-opereyt.

Sa baylo, suno kay Orillosa, dapat pagahatagan sang igtalupangod sang National Power Corporation (NAPOCOR) ang rehabilitasyon sang mga planta sang enerhiya nga madugay na nga wala namaksimisa ang kapasidad bangud indi maayo nga namentenar ang mga ini. Ginahalimbawa niya ang planta sa

Pulangi, isa sa pinakadaku sa Mindanao, nga nagatuga lamang sang 50 *megawatt*, samtang ara sa 255 *megawatt* ang kapasidad sini.

Luwas diri, masyadong mahal ang produksyon sang kuryente gamit ang plano nga baklon nga mga *generator*. Suno mismo sa Department of Energy, posibleng magtaas sang tubtob 200% ang sukot sa kuryente nga tugahon sang mga *generator*.

May duda nga luyag lamang sang rehimeng Arroyo nga ipaguwa ang binilyong piso nga pondo para likom nga magasto ini ni Arroyo kag sang iya mga alipures sa eleksyon.

Nagalala nga kaimulon kag gutom, indi na mabalibaran

NAGAMURAHAG ang kamatuoran sa pihak sang padayon nga pagbalibad ni Arroyo nga ang pangunahon nga maipanubli niya sa masunod nga administrasyon kag sa banwa amo kuno ang mga repormang kauswagan pang-ekonomiya nga ginbunga sang iya pagpungko bilang presidente sang Pilipinas.

Ang matuod, sa idalom sang halos 10 tuig sang rehimeng US-Arroyo, nag-antus ang pungsod sang pinakamataas nga lebel sang wala trabaho upod na ang pagnubo sang kalidad sang mga trabaho, pagkambyo sang minilyon nga anay may regular nga trabaho pakadto sa pagka-malaproletaryado nga wala o kulang sa trabaho. Nangin mas malala ang pagkaatrasado sang kabilugan nga ekonomiya sang pungsod. Nagnubo ang industriya kag pati ang agrikultura.

Nag-agi sa sunod-sunod nga mga krisis sa pinansya ang gubyrno. Nagtimbuok ang utang sang gubyrno kag balor nga gintigana sa bayad-utang. Pina-kadaku ang nabuhin sa mga serbisyong sosyal. Wala sang ginhimo ang rehimen sa atubang sang grabeng epekto sang pangkalibutanon nga krisis sa lokal nga ekonomiya kundi magtigana sang kuno daku nga *stimulus fund* (pondo nga pangpaandar) nga ginkurakot lamang sang nagaharing hubon.

Wala man sang mabulig sa pumuluyo ang rehimen sa atubang sang grabeng mga kalalat-an kag kahalitan nga naga-igo sa ila. Pinakamadalom ang pagbagsak sang pangabuhian sang madamo nga pamilya samtang nagataas ang presyo sang pagkaon, langis, ku-


ryente kag iban pang sandigan nga kinahanglanon ni-la. Dugang nga naglala ang kaimulon kag gutom. Pero padayon lang nga ginatinguha nga taguon sang rehimen ang mga ini.

Nabudlayan sa pagpaathag ang mga upisyal ni Arroyo sang hambalon ni Albay Gov. Joey Salceda, adbayser sa ekonomiya sang presidente, nga halin 2001 labi nga nalubong sa kaimulon ang daan na nga nagaantus samtang mas nagamanggaran ang mga daan na nga manggaranon.

Bisan sa ginmanipula nga estadistika sang National Statistics Office, nagaguwa nga halos nagdoble ang nagasingling nga mas ginagutom kag nagaantus subong sangsa sadto, halin 11.4% sang 2000 pakadto sa 20.3% sang 2009.

Kon usisaon, ang mga estadistika nga ini sang NSO malayo sa kamatuoran nga sobra kadamo sang mga Pilipino ang nagaantus sa kaimulon. Nahimo sang gubyrno nga pagamayon ang datos sang kaimulon paagi sa pagpanubo sa basehan sang kaimulon. Sa atubang sang nagamurahag nga kaimulon, nagarason pa ang mga upisyal ni Arroyo nga indi kuno malikawan nga makaagum sang pagkatuhay sang kita kadungan sang pag-uswag sang ekonomiya. May ara man kuno nga mga programa ang rehimeng Arroyo para sa imol pareho sang ayuda, barato nga bugas, bulong kag libreng pag-eskwela.

Pero ang matuod, ang mga ini nagaserbi lang nga bulugasan sang mga upisyal ni Arroyo kag wala sang balor sa paghatag sang malahalon o bisan temporaryo nga kasulhayan sa pumuluyo.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XLI No. 6
Marso 21, 2010
www.philippinerevolution.net

Editorial


Lubos nga ilatag ang mga rekisito para lab-uton ang estratehikong pagkapatas

Nagalanog sa kada pamusod sang pungsod ang kadalag-an sang taktikal nga opensiba sang mga Pu-lang hangaway sa Mansalay, Oriental Mindoro sang Marso 6. Kinse ka pasistang tropa ang napapas kag pito ang napilasan. Trese ka mabaskog nga armas ang nakumpiska sa kaaway kag nadugang sa arsenal sang hangaway sang banwa. Malipayon nga ginsaulog ang kadalag-an nga ini indi lang sang pumuluyo sang Mindoro, kundi sang bilog nga pumuluyo. Naghatag ini sang

inspirasyon kag duso sa bilog nga rebolusyonaryong hublag nga lubos isulong ang demokratikong rebolusyon sang banwa tuhtub sa kadalag-an. Signipikante ang kadalag-an nga ini kag iban pang taktikal nga opensiba labi na sa atubang sang nagahilapit nga ika-41 anibersaryo sang Bag-ong Hangaway sang Banwa.

Ginasugpunan kag ginapatampok sang mayor nga kadalag-an sang BHB sa Oriental Mindoro ang sunud-sunod nga mga kadalag-an sang BHB halin pagsugod sang tuig sa nagkalain-lain nga bahin sang pungsod. Nagahagunos ang madinalag-on nga mga taktikal nga opensiba sang BHB sa Abra, Kalinga, Mountain Province, Bulacan, Quezon, Palawan, Albay, Camarines Sur, Catanduanes, Sorsogon, Masbate, Eastern Samar, Negros, Agusan del Norte, Agusan del Sur, Surigao del Norte, Surigao del Sur, North Cotabato, Compostela Valley, Davao Oriental kag iban pang mga prubinsya sa bilog nga pungsod.

Talalupangdon nga ginalaragway sang wala-tuo nga mga kadalag-an nga ini ang kapaslwan sang kontra-rebolusyonaryo nga kampanyang Oplan Bantay Laya (OBL) sang rehimeng US-Arroyo kag Armed Forces of the Philippines. Sa pihak sang nangkon naton nga pilas sa atubang sang mabaskog kag sustenidong



Mga tampok sa isyu nga ini...

Elite forces sg militar, napapas sg BHB sa Mindoro
PAHINA 4

Morong 43, padayon nga ginaipit
PAHINA 5

Hacienda Luisita, di pagbuhian sg mga Cojuangco
PAHINA 12

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com